

# Manevel agl eclat


Beiva Runals SA: Radunanza generala

DA GION NUTEGN STGIER / ANR

■ **L'acziun da ramplazzar igl antier cunsegl d'administraziun cun novas persungas è betg reuscheida. Ena midada dattigl cun neir eligia Alberto Gini per Carlo Giovanoli tgi è sa retratg siva d'esser sto 15 onns commember da chel gremi.** Siva tgi dat la societad acziunara digls runals da Beiva e chegl èn ossa tuttegn gio 15 onns ègl do pacas radunanzas generalas calmas. Signeidas èn las radunanzas generalas igl ple stadadas da grondas emeziuns, savens er angal perveia d'ena bagatella. Adegna puspe en tema è sto igl runal digl Tua, cun chel betg esser an funcziun ordvart la staschung principala. Sonda passada è però chel betg caschuno per bieras emeziuns, persiva ègl nia pi ot tar igl tema dretg da passadi e la tschernada digls commembers digl cunsegl d'administraziun da Beiva Runals SA.

## Betg contanschia las fegnameiras

Cun la staschung 2017/18 ins dastga ansumma betg esser cuntaint, è detg Fridolin Vögeli, el tgi è siva digl 2006 president digl cunsegl d'administraziun. Las relaziuns da neiv seian stadadas optimalas, persiva ins vegia gia angal 34 deis da suglegl. Chegl seian gist 30% digls deis da menaschi. La realitad seia tgi schi l'ora sa mossa dalla sia miglra vart s'augmanta igl domber digls skiunzs e chegl per en bung po. Cugl retgav da menaschi da 754 000 francs ins dastga betg esser cuntaint, è detg Vögeli. Cun integrar la scola da skis aint igl travagl digls runals ed aveir antradas supplementaras da 301 000 francs



Fridolin Vögeli resta venant president digl cunsegl d'administraziun da Beiva Runals SA.

graztga agls mandats da prestaziun ins vegia tuttegn fatg ena sviouta dad 1,298 milliuns francs. Siva d'aveir paea paiais, costs da menaschi e fatg amortisaziuns da 146 528 francs è sa resulto en deficit da 35 000 francs per Beiva Runals SA.

## Nign tema per la radunanza generala

Dei è lung è nia discurreia perveia digl dretg da passadi tgi la famiglia Grisch dat bagn a

Beiva Runals SA, dantant cun ena cunterprestaziun da cartas gratuitas per eir cun skis. Ena part da chel tratg noua tgi igls skiunzs passan per eir tar igl runal Camon to tga agl cumegn Surses ed alla famiglia Grisch. Ossa ins tschertga ena soluziun per finalmaintg pudeir terminar chellas dispetas perveia da chel dretg da passadi. Igl president Fridolin Vögeli è però detg tg'ins dovra an sazez betg chel passadi.

## En om digl rom

An tavla èn er stadadas las tschernas digls commembers digl cunsegl d'administraziun. Vögeli è detg tgi ossa scumainza la fasa da regiuvinar chel gremi. Chegl seia er la raschung tgi Carlo Giovanoli sa reteira per far plaz ad en commember pi gioven. El seia an chels 15 onns commember digl cunsegl d'administraziun betg sto en om da gronds plects. Chel pac

tgi el scheva era però da fundamaint, nivevel e gidevel. Gist chegl tgi pertutgiva tgosas tecnicas seia Giovanoli adegna sto igl om digl rom.

## Nov candidats per tschintg posts

Sa mess a disposiziun per en ulteriour bienni da dus onns scu commembers digl cunsegl d'administraziun vevan Fridolin Vögeli, Marc Uffer, Walter Birk e Matteo Twerenbold. Per Giovanoli è Beiva Runals SA proponia Alberto Gini. Or digl mez dalla radunanza èn anc neidas proponendas las suandontas persungas per en post ainten chel gremi superiour. Chegl èn: Marc Maurer, Marco Pontiggia, Gregorio Torriani e Martina Schwendener. Damai davigl nov candidats per tschintg posts aint igl cunsegl d'administraziun. Igl è do pulitas reacziuns cun angal pacas persungas saveir da chella acziun «cunter» igl cunsegl d'administraziun existent. Nia voto è alloura an scretg. Nias elegias èn tar en total da vuschs da 1964 ed ena pluralitad absoluta da 983 vuschs:

Alberto Gini	1896 vuschs
Marc Uffer	1676 vuschs
Matteo Twerenbold	1665 vuschs
Fridolin Vögeli	1286 vuschs
Walter Birk	1203 vuschs

Fridolin Vögeli, el è detg tgi an dus onns sa reteira el scu president digl cunsegl d'administraziun da Beiva Runals SA. Chegl era per el gio cler independent digl resultat dallas elecziuns da sonda passada.

## Anterior collavuratur crititgescha Center da Sanadad Savognin

■ (rtr) **Quatter brevs da lecturs en la «Südostschweiz» crititgeschan la direcziun da l'ospital a Savognin. In anterior medi conferma quellas impresiuns. Il director Gion Cola refusa dentant quellas renfatschas.** La critica en las brevs da lecturs van surtut encunter la direcziun dal Center da Sanadad Savognin. En quellas vegn renfatschà a la direcziun che lezza «schicanescha [ils medis], fin ch'els inolteschan lur desditga».

Stefan Langenegger ha lavurà il 2015 per in mez onn sco medi assistent e sco medi superiur. El ha cumenzà a lavurar gist suenter ch'il schefmedi Rudolf Horn ha survegnì la desditga. Atgnamain era planisà da star almain in onn. Suenter in mez onn ha el – en consentiment vicendaivel cun la direcziun – smess da lavurar.

Atgnamain haja el gi in bun temp si Savognin, raquinta el. Però in pèr puncts disturbavan fitg. Dad ina vart mancava tenor el ina «cultura da soluziuns». Tar

sbagls vegniva surtut crititgà e betg tschertgà la raschun dal problem. «Igl è vegnì crititgà senza ch'ins ha guardà pli exact daco ch'in sbagl è insumma capità, di Langenegger, anterior medi superiur.

Vinavant stuevan ils medis assistents cumbatter fitg per survegnir il temp per sa perfecziunar. Medis assistents han dabun quatter uras l'emna per exempel per leger e discutir studis u per sa perfecziunar ad autra moda. Tenor Langenegger n'han els però strusch survegnì quel temp. Il motiv saja stà la mancanza da resursas.

## Director na vegn betg concret

Gion Cola prenda mo posiziun en scrit. Tenor el funcziunia la collavuraziun tranter medis e direcziun fitg bain. Ina giada l'emna sclereschian els durant ina sesida da direcziun tut las fatschentas operativas. Da la direcziun fetschian part er ils dus schefmedis. «La collavuraziun

cun ils medis è fitg buna. Quai pertutga era la collavuraziun en la direcziun», di Cola, il director dal Center da Sanadad Savognin. Sin las renfatschas concretas da Langenegger na possia el betg prender posiziun perquai ch'el sa tegnia vi d'ina cunvegna en scrit.

## Betg en ina simpla situaziun

Ils ultims set onns han tschintg medis en il cader da Savognin dà giu lur piazza. Dus medis l'onn 2017, in l'onn 2018. La fluctuaziun tar ils assistents saja anc pli gronda, scriva il director Gion Cola.

Vinavant cumbatta l'ospital Savognin cun las finanzas. Il cussegl d'administraziun ha decis il zercladur ensem cun la direcziun mesiras da spargn. Tranter auter era tar il pensum dals medis. Er il dumber da pazients va enavos. Tenor il rapport da l'onn 2017 ha il center da sanadad bunamain in quart pli paucs pazients staziunars e var 10% pli paucs cas ambulants.



Reto Schirks da Stierva mossa sen en parcour tgi igl sies e-Haffinger canoscha prest nigns impediments.

## Passa 20 autos electricas per amprar Savognin: Exposiziun

■ (pb) **Dumengia proxima, igls 14 d'otgover tranter las 10.00 e las 16.00 è a Savognin segl areal dalla Uffer SA ena exposiziun dad autos electricas. 14 marcas dad autos preschaintan lour models ed i dat er occasiun da far en gir d'amprova. Er diversas interpresas an connex cun l'energeia solara èn preschaintas all'exposiziun.** Gist da curt è igl cunsegl mundial digl clima ranfatschea alla Svizra tgi vigna fatg mengia pac per promover la mobilitad electrica. Damais è «Ela – mond d'energeia» veiramaintg agl pols digl taimp cun la sia exposiziun da dumengia proxima. I dat nigns dubis tgi electricitad scu energia regenerabla per igls vehichels a motor fiss en grond migliuramaint per igl clima ed ena ferma reducziun dallas emissiuns da CO<sub>2</sub>. Igl e-

autos persvadan er antras ena ota effizienz d'energeia. Savens mantga l'infurmaziun quant anavant tgi igls e-autos èn gio ainten lour svilup. Raspostas a tottas dumondas vignan dadas dad experts durant l'exposiziun. Uschia sen la dumonda quant gliunsch tgi ins reiva cun en e-auto, quant dei tgi dovra per carger la battareia, noua e scu saia carger ella. Ed i dat betg angal e-autos, mabagn er e-bikes e perfign autos da nez tgi von cun battareia. Reto Schirks da Stierva è construia sez ve dad en Hafflinger en indrez per la tracziun antras en motor tgi vo cun electricitad or dalla battareia. Tar l'exposiziun dattigl er divertimaint per unfants, uschia per biagier models dad autos solars u per dar sagls segl casti dad aria. I dat er ustareia da festa per tots.



La chasa da tgira ed attempads cun ospital.

FOTO F. BELOTTI